

每週經課朗誦經文(巴克禮漢羅/教羅)2014/02/09

共同經課 - 1

以賽亞書五十八章一節~九 a 節

1 你 tiòh 大聲喉叫, m̄-thang 限止, 出大聲親像 pùn 哨角, 對我 ê 百姓講明 in ê 過失, 對雅各 ê 家講明 in ê 罪惡。2 In 日日 chhē 我, 歡喜知我 ê 道路, 親像行義 ê 百姓, 無離開 in ê 上帝 ê 法律; in 求我照公義 ê 審判, 歡喜親近上帝。3 In 講, 阮禁食, 你啥事無看見? 阮刻苦阮 ê 心, 你啥事 m̄知 ah? 看 ah, lín 禁食 ê 日, iáu-kú 家已安樂, 強迫人 kā lín 做苦工。4 看 ah, lín 禁食是 beh 相爭, 相冤家, 用兇惡 ê 拳頭母 phah 人; lín 今 á 日禁食, boē 能 hō lín ê 聲聽到頂面。5 Chit 款 ê 禁食, kiám 是我所揀, hō 人刻苦伊 ê 心 ê 日 mah? Kiám 是 hō 人俯頭親像蘆竹, 用麻布 kap 火灰鋪 tī 伊 ê 身軀下 mah? 這 kiám thang 稱做禁食 hō 耶和華所歡喜 ê 日 mah? 6 我所揀 ê 禁食, kiám-m̄ 是 tháu 開兇惡 ê 索, tháu 放背擔 ê 索, hō 受制壓 ê 得 tiòh 自由, kòng 折一切 ê 擔 mah? 7 Kiám-m̄ 是將你 ê 米糧分 hō iau 餓 ê 人, 將四界流 ê sòng-hiong 人接納 tī 你 ê 家? 看見 thng-pak-theh ê 人 hō 伊穿, tui 家已 ê 骨肉亦無閃去 bih mah? 8 An-ni, 你 ê 光 beh 發出親像天光早 ê 光, 你 ê 傷 beh 緊緊得 tiòh 好; 你 ê 公義 beh 行 tī 你 ê 頭前; 耶和華 ê 榮光 beh 做你後面 ê 保護。9 Hit 時你求叫, 耶和華 beh 聽你; 你懇求, 伊 beh 講, 我 tī-chia。

共同經課 - 2

詩篇一百一十二篇一節~十節

1 Lín tiòh o-ló 耶和華。 敬畏耶和華, 大歡喜伊 ê 命令 ê, Chit 號人有福氣。2 伊 ê 後裔 tī 世間的確強盛; 正直 ê 人 ê 後代, 的確 beh 得 tiòh 福氣。3 伊 ê 家內有貨物, 有錢財; 伊 ê 公義船到永遠。4 正直 ê 人 tī 烏暗 ê 中間, 有光為 tiòh 伊發現; 伊有恩惠, 有憐憫, 有公義。5 施恩來借人 ê, 有福氣; 伊受審判 ê 時, beh 訴明家已 ê 事。6 伊永永無搖 choah; 義人受記念, 直到永遠。7 伊 m̄驚 pháiⁿ 消息; 伊 ê 心堅固, oá 靠耶和華。8 伊 ê 心自在, lóng 無驚惶, 直到伊看見伊 ê 對敵受報應。9 伊大捨施, 伊賑濟 sòng-hiong 人; 伊 ê 仁義存到永遠; 伊 ê 角得 tiòh 舉起, 有榮光。10 Pháiⁿ 人看了 boē-khat 得, 的確咬牙切齒, 來消滅; Pháiⁿ 人 ê 心願 beh 歸 tī 無。

共同經課 - 3

哥林多前書二章一節~十二節

1 兄弟 ah, 我前就近 lín, 無用深沉 ê 言語, á 是智慧, 來對 lín 傳上帝 ê 奧妙。2 因為我決斷 tī lín 中間 m̄ 知別項, 只有知耶穌基督釘十字架 ê nā-tiāⁿ。3 Koh 我 kap lín tī-teh ê 時是軟弱、驚惶、gī-gī-chhoah。4 我所講所傳 ê 不在智慧好聽 ê 話, 是在 tī 聖神 kap 權能 ê 闡明; 5 beh hō lín ê 信不在人 ê 智慧, 是在 tī 上帝 ê 權能。6 但是阮 tī 練達 ê 人 ê 中間講智慧; 獨獨 m̄ 是 chit 世間 ê 智慧, 也 m̄ 是 chit 世間 chiah-ê beh 廢無 ê 掌權 ê 智慧; 7 是講上帝奧妙中 ê 智慧, 前所隱密 ê, 就是上帝 tī 萬世代以前所事先定 tiòh hō 咱得 tiòh 榮光 ê。8 Chit-ê 智慧 chit 世間掌權 ê 無一個知; 若知, 就無將榮光 ê 主釘 tī 十字架; 9 是照所記載講, 目睷未 bat 看見, 耳孔未 bat 聽見, 人 ê 心未 bat 想 tiòh ê, 就是上帝為 tiòh 疼伊 ê 人見若所備辦 ê。10 但是上帝有用聖神 kā 咱顯明伊; 因為聖神透徹萬事 kap 上帝 ê 深奧。11 Taⁿ 人 ê 事, 若 m̄ 是伊家已 ê 神, 別人 chī-chūi 會知? án-ni 上帝 ê 事, 若 m̄ 是上帝 ê 神, 也無一個會知。12 但是咱所得 tiòh m̄ 是世間 ê 神, 就是 tui 上帝來 ê 神, beh hō 咱知上帝所白白賞賜咱 ê。

共同經課 - 4

馬太福音五章十三節~二十節

13 Lín 是地上 ê 鹽; 鹽若失味, beh 用甚麼 hō 伊鹹? 後來無路用, 不過 hiat tī 外面, hō 人 thún 踏 nā-tiāⁿ。14 Lín 是世間 ê 光; 城起 tī 山頂 boē-oē 隱密。15 無人點燈 hē tī 斗下, 就是 hē tī 燈台頂, 就遍照厝內 ê 人。16 An-ni lín ê 光 tiòh 照 tī 人 ê 面前, hō in 看見 lín ê 好所行, 來歸榮光 hō lín tī 天裡 ê 父。17 莫得 phah 算我來是 beh 廢無律法, á 是先知; 我來 m̄ 是 beh 廢無, 是 beh 應驗。18 因為我實在 kā lín 講, 就到天地廢無, 律法 ê 一點一畫亦決斷 boē 廢無, 到 lóng 總成。19 所以見若毀壞 chiah-ê 誠命至微細 ê 一條, 續 án-ni 教示人 ê, tī 天國 beh 稱伊做至微細; 獨獨見若行續教示人 ê, tī 天國 beh 稱伊做大。20 因為我 kā lín 講, 設使 lín ê 義無贏過經學士 kap 法利賽人 ê 義, 決斷 boē 得入天國。